

歷代閨秀詞選集評

徐珂選輯

杭縣徐珂編輯

歷代閨秀詞選集

商務印書館發行

壺中天慢

宋東武趙明
誠室濟南 李清照 易安

蕭條庭院。又斜風細雨。重門須閉。寵柳嬌花寒食近，種惱人天氣。險韻詩成。扶頭酒醒。別是閒滋味。征鴻過盡。萬千心事難寄。樓上幾日春寒。簾垂四面。玉闌干慵倚。被冷香消新夢覺。不許愁人不起。清露晨流。新桐初引。多少游春意。日高烟斂。更看今日晴未。

黃叔暘曰前輩稱易安綠肥紅瘦爲佳句予謂寵柳嬌花語亦甚

奇俊前此未有能道之者只寫心緒落漠遇寒食更難遣耳陡然而起便爾深邃至前段云重門須閉後段云不許愁人不起一開一合情各戛戛生新起處雨結句晴局法渾成

聲聲慢

李清照

尋尋覓覓。冷冷清清。悽悽慘慘切切。乍暖還寒。時候最難將息。三杯兩盞淡酒。怎敵他[△]曉來風急。鴈過也。正傷心。卻是舊時相識。滿地黃花堆積。憔悴損[△]如今有誰

堪摘守着窗兒。獨自怎生得黑。梧桐更兼細雨。到黃昏[△]
點點滴滴。這次第[△]。怎一個愁字了得。

黃叔暘曰黑字真不許第二人押 周止庵曰雙聲疊韻字須着
意布置重字則既雙且疊尤宜斟酌如此處三疊韻六雙聲是鍛
鍊出來非偶然拈得也 王壬秋曰亦是女郎語諸家賞其七疊
亦以初見故新效之則可嘔又曰黑韻卻新 梁任公曰此詞最
得咽字訣清真不及也

浣溪沙

李清照

髻子傷春懶更梳。晚風庭院落梅初。淡雲來往月疏疏。
玉鴨熏爐閑瑞腦。朱櫻斗帳掩流蘇。通犀還解辟寒
無。

譚復堂師曰易安居士獨此篇有唐調選家鑑治遂標此奇

漁家傲

李清照

天接雲濤連曉霧。星河欲轉千帆舞。彷彿夢魂歸帝所。
聞天語。殷勤問我歸何處。我報路長嗟日暮。學詩漫

有驚人句。九萬里風鵬正舉。風休住。蓬舟吹取三山去。

梁任公曰此絕似蘇辛派不類漱玉集中語

醉花陰

李清照

薄霧濃雲愁永晝。瑞腦銷金獸。佳節又重陽。玉枕紗廚。
半夜涼初透。東籬把酒黃昏後。有暗香盈袖。莫道不
消魂。簾捲西風。人比黃花瘦。

王壬秋曰末二句若非女子自寫顯則無意致

如夢令

李清照

昨夜雨疎風驟。濃睡不消殘酒。試問捲簾人。卻道海棠依舊。知否。知否。應是綠肥紅瘦。

沈際飛曰知否二字疊得甚新 黃蓼園曰一問極有情答以依

舊答得極澹跌出知否二句來而綠肥紅瘦無限淒惋却又妙在含蓄短幅中藏無數曲折自是聖於詞者

怨王孫

李清照

夢斷漏悄。愁濃酒惱。寶枕生寒。翠枕向曉。門外誰掃殘
紅。夜來風。玉簫聲斷。人何處。春又去。忍把歸期負。此
情此恨。此際擬託行雲。問東君。

沈際飛曰換韻有兔起鶻落之致

滿庭芳

宋 徐君寶妻

海上繁華。江南人物。尙遺宣政風流。綠窗朱戶。十里爛
銀鈎。一旦刀兵齊舉。旌旂擁。百萬貔貅。長驅入。歌臺舞

樹。風卷落花愁。清平三百載。典章文物。掃地俱休。幸
此身未北。猶客南州。破鑑徐郎何在。空惆悵。相見無由。
從今後。斷魂千里。夜夜岳陽樓。

王壬秋曰寫兵亂國亡正是不相干人語非吳梅村所得借口亦
非趙子昂所能說也

鷓鴣天

寄李之問

宋李之問
同室

聶勝瓊

玉慘花愁出鳳城。蓮花樓下柳青青。尊前一唱陽關曲。

別箇人人第幾程。尋好夢。夢難成。有誰知我此時情。
枕前淚共階前雨。隔箇窗兒滴到明。

況夔笙曰自然妙造不假追琢愈渾成愈穠粹於北宋名家中頗
近六一東山 徐珂按勝瓊初隸樂籍後嫁之問

菩薩蠻

明廬張嫺倩

落花風捲愁難歇。枝頭燕剪裁桃葉。花氣沁蘭香。游絲
挂綠窗。蕉青鸞翅影。草碧龍鬚冷。無語倚瑤琴。閒花

在膽瓶。

伊人思曰。雖綠窗自怨。不失貞靜。

踏莎行

清海寧陳之
遼室吳縣

徐

燦
湘蘋

芳草纔芽。梨花未雨。春魂已作天涯絮。晶簾宛轉爲誰
垂。金衣飛上櫻桃樹。故國茫茫。扁舟何許。夕陽一片
江流去。碧雲猶疊舊河山。月痕休到深深處。

譚復堂師曰興亡之感相國愧之

永遇樂

病中

徐 燦

翠帳春寒。玉墀雨細。病懷如許。永晝悵悵。黃昏悄悄。金
博添愁炷。薄倖楊花。多情燕子。時向瑣窗細語。怨東風。
一夕無端。狼籍幾番紅雨。曲曲闌干。沈沈簾幙。嫩草
王孫歸路。短夢飛雲。冷香侵佩。別有傷心處。半暖微寒。
欲晴還雨。消得許多愁否。春來也。愁隨春長。肯放春歸
去。

譚復堂師曰相國加膝墜淵愆咎自積此詞殊怨

永遇樂

舟中感舊

徐 燦

無恙桃花。依然燕子。春景多別。前度劉郎。重來江令。往事何堪說。近水殘陽。龍歸劍杳。多少英雄淚血。千古恨。河山如許。豪華一瞬。拋撇。白玉樓前。黃金臺畔。夜夜只留明月。休笑垂楊。而今金盡。穠李還銷歇。世事流雲。人生飛絮。都付斷猿悲咽。西山在。愁容慘黛。如共人淒

切。

譚復堂師曰外似悲壯中實悲咽欲言未言

清平樂

清金莊

淒涼晚色。絲雨和愁織。夢到楚江行不得。一片濕雲吹
隔。年時曾憶城東。杏花點點飛紅。門外憑他寒食。玉
闌自有春風。

譚復堂師曰大手筆

黃花慢

孤雁

清丹陽
周某室 賀雙卿

碧盡遙天。但暮霞散綺。碎翦紅鮮。聽時愁近。望時怕遠。
孤鴻一箇。去向誰邊。素霜已冷蘆花渚。更休猜鷗鷺相
憐。暗自眠。鳳凰縱好。寧是姻緣。淒涼勸你無言。趁一
沙半水。且度流年。稻梁初盡。網羅正苦。夢魂易警。幾處
寒煙。斷腸可是嬋娟意。寸心裏多少纏絲。夜未閒。倦飛
便宿平田。

譚復堂師曰：「清空一氣如拭，忠厚之旨出於風雅。」

鳳凰臺上憶吹簫

殘體

賀雙卿

已暗忘吹。欲明誰別。向儂無燄如螢。聽土階寒雨。滴破
殘更。獨自慙慙耿耿。難斷處。也忒多情。香膏盡。芳心未
冷。且伴雙卿。星星漸微不動。還望你淹煎。有箇花生。
勝野塘風亂。搖曳漁燈。辛苦秋蛾散後。人已病。病減何
曾。相看久。朦朧成睡。睡去還驚。